



QUÆSTIO MEDICA,

QUOD LIBETARIIS DISPUTATIONIBUS
manè discutienda in Scholis Medicorum, die
Jovis decimâ-septimâ Februarii.

M. CAROLO CONTUGI, Doctore
Medico, Præsidente.

Est ne chylus factus alimentum?

I.

UT obscurum quâ ratione liberi in generis humani officinâ cudantur: sic involuta eorum nutritio. Fallitur qui ex utriusque parentis ejaculatis, exactè commixtis, & ab utero allicitis seminibus, humanum corpus generari existimat: & præter materiam, quæ nec est singularum partium portio, nec totius coporis rudimentum, in semine facultatem formatricem, totum generationis opus dirigentem, comprehensam tenet. Ex uno coitu plurimum factuum productio, admirabilisque corporis humani structura, quæ fortuito particularum seminis motu nequaquam efformari potest, contrarium evincit. Inest mulieribus principium fœtus, ovum scilicet, in quo omnes futuri hominis partes jam formatæ sunt. Illud maris & fœminæ semine fecundatum, ex ovariis testes vulgo dictis, per tubas in uterum

2

delabitur; cujus calore & humiditate intumescit. Interim spiritus intus contentus exsuscitatur. Hic quasi veterno excusso avolare nititur; verum à staminibus in fugâ detentus claustra sua expandit, & nisu suo dilatat: hinc foetus radices in uteri fundum spargit, per quas alimentum excipit, quo spatiosa à spiritu dilatata implentur, & pedetentim omnes foetus partes evolvuntur; modo non planè diverso ac plantarum semina terræ mandata, explicantur.

I I.

EX venularum umbilicalium extremitatibus utero ap-
pensis, foetum pro alimento maternum sanguinem assiduò rapere, qui credit, pariter errat. Sanguis qui per arterias ad uterum pellitur, in foetus nutritionem non impenditur; cum nec foetui accomodatum sit alimentum, nec ab utero in eum migret. Venæ umbilicales non in uteri, sed in papillas inferuntur, arterias, quæ chylum, non sanguinem, recipiunt & profundunt. Chylus in matre primùm elaboratus, deferitur ad uterum unâ cum sanguine per arterias, aut lacteis forsan vasis. Ibi ope glandularum, sanguini materno aditum prohibentium, percolatur: ramulos deinde venarum umbilicalium ingressurus. Ut in ovo albumen placentæ subiens purpureum colorem induit; sic chylus in placentæ tubulis fermentatione, quâ particularum motus & figura mutantur, in sanguinem convertitur. Hic è placentâ per venam umbilicalem fluit in foetum. Cujus nutritioni eò aptior est, quòd in ipsius vasis confectus, foetui cognatior sit.

I I I.

QUI chylum nutriendi foetus gratiâ, lacteis vasis ad uterum appellere vix credit, quòd illi ductus investigantium oculos in hunc usque diem effugerint, quanquam mentis scrutinio haud obscuri sint, & rationis acumine hebetudo sensûs in hac re compensanda: illum saltem non confusum nec mutatum, per arterias ad papillas deferri pro

certo habeat. Chylus, uteri glandulis à sanguine separatur, simili ratione ac in mammis, lac producturus. Secretus placentam subit, in quâ miscetur cum sanguine, quem binæ arteriæ advehunt è corpore fœtus, in placentam ad chylum fermentandum. Hic unâ cum sanguine arterioso è capillaribus venâ umbilicalis ramulis primam adeptus elaborationem, in majorem truncum delabitur, in quo novâ agitatione, illius particulæ à se invicem ita dividuntur, ut cum sanguine confundantur atque illius naturam induant: ut chylus in nati pueri vasis, multis ac repetitis circuitibus in sanguinem omnino convertitur.

IV.

CHYLUM non sanguinem in placentam devehit solitâ naturæ agendi ratione confirmatur. Hæc in animantibus leges posuit, quas perpetuò sequitur, rarò ab iis discessura. Omnes animantes in utero conclusas nutrit chylo. Id ex uteri prægnantis animantis sectione compertum, quâ venarum umbilicalium ramos in uteri papillas, non in arteriarum oscula inferi patet, è quibus avulsæ papillæ humorem chylo simillimum profundunt. Hunc humorem statim à partu omnia ferè animalia lambendo auferunt, absorbent, avidissimè devorant, cum fœtus excrementa ne attingant quidem. Si id perpetuum in animantibus: in homine etiam fœtum chylo nutriri necessum est; cujus generatio, nutritio, accretio non absimilis.

V.

MULIERIS uterò gerentis, à denegato sufficienti alimento, abortus, præsentè tamen sanguinis copiâ: & ad gravidarum morbos pluries adhibita venæ sectio, absque ullâ fœtui illatâ injuriâ; chylum, non sanguinem maternum in fœtus alimoniam facessere evincunt. Illum toto gravitationis tempore, partim per venas umbilicales recipit, partim per os fugit. Chylus quandiù appellit ad uterum, tandiù in eo fœtus retinetur. Desinit fluere, cum

4

nimiā uteri distentione clauduntur poruli papillarum, per
quas fluebat. Quo factō maturus excidit, tanquam ē defic-
cato pedunculo, & pari sui matrisque nisu, sese utero con-
trahente, iuvantibus Diaphragmate, musculisque Abdomi-
nis, prodit in lucem, eodem, quem per mammas fugit,
chylo nutriendus.

Ergo chylus est fœtus alimentum.

Domini Doctores disputaturi.

M. Ioannes Daval.

M. Bertinus-Simon Dieuxvoye.

M. Raymondus Finot.

M. Claude Quiquebœuf.

M. Ioannes Boudin.

M. Matthæus Thuillier.

M. Ioannes Michel Garbe.

M. Guido Erasme Emmerex.

M. Carolus Marteau.

Proponēbat Lutetiæ ALEXIUS LITTRE, Corduens̄s, Bacca-
laureus Medicus. A. R. S. H. 1689.

P A R I S I I S,

Apud Franciscum Muguet, Regis, & Facultatis Medicinæ
Typographum.